

第柒冊

人物志一

人物志二

晉書續編卷之三

商水縣志卷十七

人物志一

列傳

後漢

袁安字邵公汝南汝陽人也祖父良習孟氏易平帝時舉明經爲太子舍人建武初至成武令安少傳良學爲人嚴重有威見敬於州里初爲縣功曹奉檄詣從事從事因安致書於令安曰公事自有郵驛私請則非功曹所持辭不肯受從事懼然而止後舉孝廉除陰平長任城令所在吏人畏而愛之永平十三年楚王英謀爲逆事下郡覆考明年三府舉安能理劇拜楚郡太守是時英辭所連及繫者數千人顯宗怒甚吏案之急迫痛自誣死者甚衆安到郡不入府先往案獄理其無明驗者條上出之

商水縣志

卷十七

人物志

一

府丞掾史皆叩頭爭以爲阿附反虜法與同罪不可安曰如有不合太守自當坐之不以相及也遂分別具奏帝感悟即報許得出者四百餘家歲餘徵爲河南尹政號嚴明然未曾以臧罪鞠人常稱曰凡學仕者高則望宰相下則希牧守錮人於聖世尹所不忍爲也聞之者皆感激自勵在職十年京師肅然名重朝廷建初八年遷太僕元和二年武威太守孟雲上書北虜既已和親而南部復徃抄掠北單于謂漢欺之謀欲犯邊宜還其生口以安慰之詔百官議朝堂公卿皆言夷狄譎詐求欲無厭既得生口當復妄自誇大不可開許安獨曰北虜遣使奉獻和親有得邊生口者輒以歸漢此明其畏威而非先違約也雲以大臣典邊不宜負信於戎狄還之足示中國優貸使邊人得安誠便司徒桓虞改議從安太尉鄭弘司空第五倫皆恨之弘因

大言激勵虞曰諸言當還生口者皆爲不忠虞廷叱之倫及太鴻臚韋彪各作色變容司隸校尉舉奏安等皆上印綬謝肅宗詔報曰久議沉滯各有所志蓋事以議從策由衆定閭閻衍衍得禮之容寢嘿抑心更非朝廷之福君何尤而深謝其各冠履帝竟從安議明年代第五倫爲司空章和元年代桓虞爲司徒和帝即位竇太后臨朝后兄車騎將軍憲北擊匈奴安與太尉宋由司空任隗及九卿詣朝堂上書諫以爲匈奴不犯邊塞而無故勞師遠涉損費國用徼功萬里非社稷之計書連上輒寢宋由懼遂不敢復署議而諸卿稍自引止唯安獨與任隗守正不移至免冠朝堂固爭者十上太后不聽衆皆爲之危懼安正色自若竇憲既出而弟衛尉篤執金吾景各專威權公於京師使客遮道奪人財物景又擅使乘驛施檄緣邊諸郡發突騎及

善騎射有才力者漁陽鴈門上谷三郡各遣吏將送詣景第有司畏憚莫敢言者安乃劾景擅發邊兵驚感吏人二千石不待符信而輒承景檄當伏顯誅又奏司隸校尉河南尹阿附貴戚無盡節之義請免官案罪並寢不報憲景等日益橫盡樹其親黨賓客於名都大郡皆賦斂吏人更相賂遺其餘州郡亦復望風從之安與任隗舉奏諸二千石又它所連及貶秩免官者四十餘人竇氏大恨但安隗素行高亦未有以害之時竇憲復出屯武威明年北單于爲耿夔所破遁走烏孫塞北地空餘部不知所屬憲日矜已功欲結恩北虜乃上立降者左鹿蠡王阿佟爲北單于置中郎將領護如南單于故事事下公卿議太尉宋由太常丁鴻光祿勳耿秉等十人議可許安與任隗奏以爲光武招懷南虜非謂可永安內地正以權時之算可得扞禦北狄

故也今朔漠既定宜令南單于反其北庭並領降衆無緣復更立阿佟以增國費宗正劉方大司農尹睦同安議事奏未以時定安懼憲計遂行乃獨上封事曰臣聞功有難圖不可豫見事有易斷較然不疑伏惟光武皇帝本所以立南單于者欲安南定北之策也恩德甚備故匈奴遂分邊境無患孝明皇帝奉承先意不敢失墜赫然命將爰伐塞北至於章和之初降者十萬餘人議者欲置之濱塞東至遼東太尉宋由光祿勳耿秉皆以爲失南單于心不可先帝從之陛下奉承鴻業大開疆宇大將軍遠師討伐席捲北庭此誠宣明祖宗崇立弘勲者也宜審其終以成厥初伏念南單于屯先父舉衆歸德自蒙恩以來四十餘年三帝積累以遺陛下陛下深宜遵述先志成就其業况屯首唱大謀空盡北虜輟而弗圖更立新降以一朝之計違三世

之規失信於所養建立於無功由秉實知舊議而欲背棄先恩夫言行君子之樞機賞罰理國之綱紀論語曰言忠信行篤敬雖蠻貊行焉今若失信於一屯則百蠻不敢復保誓矣又烏桓鮮卑新殺北單于凡人之情咸畏仇讐今立其弟則二虜懷怨兵食可廢信不可去且漢故事供給南單于費直歲億九十餘萬西域歲七千四百八十萬今北庭彌遠其費過倍是乃空盡天下而非建策之要也詔下其議安又與憲更相難折憲險急負執言辭驕訐至詆毀安稱光武誅韓歆戴涉故事安終不移憲竟立匈奴降者右鹿蠡王於除鞬爲單于後遂反叛卒如安策安以天子幼弱外戚擅權每朝會進見及與公卿言國家事未嘗不噫鳴流涕自天子及大臣皆恃賴之四年春薨朝廷痛惜焉後數月竇氏敗帝始親萬機追思前議者邪正之節乃除

安子賞爲郎策免宋由以尹睦爲太尉劉方爲司空睦河南人
薨於位方平原人後坐事免歸自殺初安父沒母使安訪求葬
地道逢三書生問安何之安爲言其故生乃指一處云葬此地
當世爲上公須臾不見安異之於是遂葬其所占之地故累世

隆盛焉安子京敞最知名

後漢書
本傳

袁敞字叔平少傳易經教授以父任爲太子舍人和帝時歷位將
軍大夫侍中出爲東郡太守徵拜太僕光祿勳元初三年代劉
愷爲司空明年坐子與尙書郎張俊交通漏洩省中語策免敞
廉勁不阿權貴失鄧氏旨遂自殺已朝廷悔之薄敞罪而隱其
死以三公禮葬之復其官子盱仕至光祿勳時大將軍梁冀擅
朝內外莫不阿附唯盱與廷尉邯鄲義正身自守及桓帝誅冀
使盱持節收其印綬事已具梁冀傳

後漢書
本傳

商水縣志

卷十七

人物志

四

袁彭字伯楚京子也少傳父業歷廣漢南陽太守順帝初光祿勳
行至清爲吏麤袍糲食終於議郎尙書胡廣等追表其有清潔
之美比前朝貢禹第五倫末蒙顯贈當時皆嗟歎之彭弟湯字
仲河少傳家學諸儒稱其節多歷顯位桓帝初爲司空以豫議
定策封安國亭侯食邑五百戶累遷司徒太尉以災異策免卒
謚曰康侯湯長子成左中郎早卒次子逢嗣

後漢書
袁安傳

袁逢字周陽湯次子也以累世三公子寬厚篤信著稱於時靈帝
時立逢以太僕豫議增封三百戶後爲司空卒於執金吾朝廷
以逢嘗爲三老特優禮之賜以珠畫特詔祕器飯含珠玉三十
六品使五官中郎將持節奉策贈以車騎將軍印綬加號特進
謚曰宣文侯子基嗣位至太僕逢弟隗少歷顯官先逢爲三公
至中常侍袁赦隗之宗也用事於中以逢隗世宰相家推崇以

爲外援故袁氏貴寵於世富奢甚不與它公族同獻帝初隗爲
太傅成子紹逢子術自有傳董卓忿紹術背已遂誅隗及術兄
基等男女二十餘人

後漢書
袁安傳

袁原汝陽人漢安帝時司徒忠蹇匪躬盡誠事國啟發和帝誅討
竇氏中興以來最爲名宰

後漢書

周舉字宣光汝南汝陽人陳留太守防之子防在儒林傳舉姿貌
短陋而博學洽聞爲儒者所宗故京師爲之語曰五經從橫周
宣光延喜四年辟司徒李郃府時宦豎孫程等立順帝誅滅諸
閹議郎陳禪以爲閹太后與帝無母子恩宜徙別館絕朝見羣
臣議者咸以爲宜舉謂郃曰昔鄭武姜謀殺莊公誓之黃泉秦
始皇怨母失行久而隔絕後感潁考叔茅焦之言循復子道書
傳美之今諸閹新誅太后幽在離宮若悲愁生疾一旦不虞主

商水縣志

卷十七

人物志

五

上將何以令於天下如從禪議後世歸咎明公宜密表朝廷令
奉太后率厲羣臣朝覲如舊以厭天心以答人望郃即上疏陳
之明年正月帝乃朝於東宮太后由此以安後長樂少府朱偃
代郃爲司徒舉猶爲吏時孫程等坐懷表上殿爭功帝怒悉徙
封遠縣勅洛陽令促期發遣舉說朱偃曰朝廷在西鍾下時非
孫程等豈立雖韓彭吳賈之功何以加諸今忘其大德錄其小
過如道路夭折帝有殺功臣之譏及今未去宜急表之偃曰今
詔怒二尚書已奏其事吾獨表此必致罪譴舉曰明公年過八
十位至台輔不於今時竭忠報國惜身安寵欲以何求祿位雖
全必陷佞邪之譏諫而獲罪猶有忠貞之名若舉言不足採請
從此辭偃乃表諫帝果從之舉後舉茂才爲平丘令上書言當
世得失辭甚切正尚書郭虔應賀等見之歎息共上疏稱舉忠

直欲帝置章御坐以爲規誡舉稍遷并州刺史太原一郡舊俗以介子推焚骸有龍忌之禁至其亡月咸言神靈不樂舉火由是士民每冬中輒一月寒食莫敢煙爨老小不堪歲多死者舉既到州乃作弔書以置子推之廟言盛冬去火殘損民命非賢者之意以宣示愚民使還溫食於是衆惑稍解風俗頗革轉冀州刺史陽嘉三年司隸校尉左雄薦舉徵拜尚書舉與僕射黃瓊同心輔政名重朝廷左右憚之是歲河南三輔大旱五穀災傷天子親自露坐德陽殿東廂請雨又下司隸河南禱祀河神名山大澤詔書以舉才學優深特下策問曰朕以不德仰承三統夙興夜寐思協大中頃年以來旱災屢應稼穡焦枯民食困乏五品不訓王澤未流羣司素餐據非其位審所貶黜變復之徵厥効何由分別具對勿有所諱舉條對甚切因召見舉及尚

書令成翊世僕射黃瓊問以得失舉等並對以爲宜慎官人去斥貪汙離遠佞邪循文帝之儉尊孝明之教則時雨必應帝曰百官貪汙佞邪者爲誰乎舉獨對曰臣從下州超備機密不足以別羣臣然公卿大臣數有直言者忠貞也阿諛苟容者佞邪也司徒視事六年未聞有忠言異謀愚心在此其後以事免司徒劉崎遷舉司隸校尉永和元年災異數見省內惡之詔召公卿中二千石尚書詣顯親殿問曰言事者多云昔周公攝天子事及薨成王欲以公禮葬之天爲動變及更葬以天子之禮即有反風之應北鄉侯親爲天子而葬以王禮故數有災異宜加以尊謚列於昭穆羣臣議者多謂宜如詔旨舉獨對曰昔周公正統姦臣所立立不踰歲年號未改皇天不祐大命天昏春秋

王子猛不稱崩魯子野不書葬今北鄉侯無它功德以王禮葬之於事已崇不宜稱謚災眚之來弗由此也於是司徒黃尚太常桓焉等七十人同舉議帝從之舉出爲蜀郡太守坐事免大將軍梁商表爲從事中郎甚敬重焉六年三月上巳日商大會賓客讌於洛水舉時稱疾不往商疾篤帝親臨幸問以遺言對曰人之將死其言也善臣從事中郎周舉清高中正可重任也由是拜舉諫議大夫時連有災異帝思商言召舉於顯親殿問以變眚舉對曰陛下初立遵脩舊典興化致政遠近肅然頃年以來稍違於前朝多寵倖祿不序德觀天察人準今方古誠可危懼書曰僭恒暘若夫僭差無度則言不從而下不正陽無以制則上擾下竭宜密嚴勅州郡察疆宗大姦以時禽討其後江淮猾賊周生徐鳳等處處並起如舉所陳時詔遣八使巡行風

俗皆選素有威名者乃拜舉爲侍中與侍中杜喬守光祿大夫周栩前青州刺史馮羨尚書欒巴侍御史張綱兗州刺史郭遵大尉長史劉班並守光祿大夫分行天下其刺史二千石有臧罪顯明者驛馬上之墨綬以下便輒收舉其有清忠惠利爲百姓所安宜表異者皆以狀上於是八使同時俱拜天下號曰八俊舉於是劾奏貪猾表薦公清朝廷稱之遷河內太守徵爲大鴻臚及梁太后臨朝詔以殤帝幼崩廟次宜在順帝下太常馬訪奏宜如詔書諫議大夫呂勃以爲應依昭穆之序先殤帝後順帝詔下公卿舉譏曰春秋魯閔公無子庶兄僖公代立其子文公遂躋僖於閔上孔子譏之書曰有事于太廟躋僖公傳曰逆祀也及定公正其序經曰從祀先公爲萬世法也今殤帝在先於秩爲父順帝在後於親爲子先後之義不改昭穆之序不

可亂呂勃議是也太后下詔從之遷光祿勳會遭母憂去職後拜光祿大夫建和三年卒朝廷以舉清公亮直方欲以爲宰相

深痛惜之

節後漢書本傳其中奏疏仿鄭樵通志例節去另編入麗藻志下同

袁紹字本初汝南汝陽人司徒湯之孫父成五官中郎將紹壯健好交結大將軍梁冀以下莫不善之紹少爲郎除濮陽長遭母憂去官三年禮竟追感幼孤又行父服服闋徙居洛陽紹有姿貌威容愛士養名既累世台司賓客所歸加傾心折節莫不爭赴其庭士無貴賤與之抗禮輜輶柴穀填接街陌內官皆惡之中常侍趙忠言於省內曰袁本初坐作聲價好養死士不知此兒終欲何作叔父太傅隗聞而呼紹以忠言責之紹終不改後辟大將軍何進掾爲侍御史虎賁中郎將中平五年初置西園八校尉以紹爲佐軍校尉靈帝崩紹勸何進徵董卓等衆軍脇

商水縣志

卷十七

人物志

八

太后誅諸宦官轉紹司隸校尉卓議欲廢立謂紹曰天下之主宜得賢明每念靈帝令人憤毒董侯似可今當立之紹曰今上富於春秋末有不善宣於天下若公違禮任情廢嫡立庶恐衆議未安卓按劍叱紹曰豎子敢然天下之事豈不在我我欲爲之誰敢不從紹詭對曰此國之大事請出與太傅議之卓復言劉氏種不足復遺紹勃然曰天下健者豈惟董公橫刀長揖徑出懸節於上東門而奔冀州董卓購募求紹時侍中周璠城門校尉伍瓊爲卓所信恃瓊等陰爲紹說卓卓以爲然乃遣授紹勃海太守封邳鄉侯紹猶稱兼司隸初平元年紹遂以勃海起兵以從弟後將軍術冀州牧韓馥等同時俱起衆各數萬以討卓爲名衆推紹爲盟主紹自號車騎將軍領司隸校尉董卓聞紹起山東乃誅紹叔父隗及宗族在京師者盡滅之是時豪傑

既多附紹且感其家禍人思爲報州郡蜂起莫不以袁氏爲名
紹客逢紀謂紹曰夫舉大事非據一州無以自立今冀部強實
而韓馥庸才可密要公孫瓚將兵南下馥聞必駭懼并遣辯士
爲陳禍福馥迫於倉卒必可因據其位紹然之益親紀即以書
與瓚瓚遂引兵而至外託董卓而陰謀襲馥紹乃使外甥陳留
高幹及潁川荀諝等說馥馥素性恇怯乃避位遣子送印綬以
讓紹紹送領冀州牧承制其冬公孫瓚大破黃巾還屯槃河威
震河北冀州諸城無不望風嚮應紹乃自擊破之三年瓚又遣
兵至龍湊挑戰紹復擊破之四年初天子遣太僕趙岐和解關
東使各罷兵紹於是引軍南還三月上巳大會賓徒於薄落津
聞魏郡兵反與黑山賊于毒等數萬人共覆鄴城殺郡守坐中
客家在鄴者皆憂怖失色或起而啼泣紹容貌自若不改常度

賊有陶升者自號平漢將軍獨反諸賊將部衆踰西城入閉府
門具車重載紹家及諸衣冠在州內者身自扞衛送到斥邱紹
還因屯斥邱以陶升爲建義中郎將六月紹乃出軍入朝歌鹿
腸山蒼巖谷口討于毒圍攻五日破之斬毒及其衆萬餘級紹
遂尋山北行進擊諸賊左髡文八等皆斬之又擊劉石青牛角
黃龍左校郭大賢李大目于氏根等復斬數萬級皆屠其屯壁
興平二年拜紹右將軍其冬車駕爲李傕等所迫於曹陽沮授
說紹曰將軍累葉台輔世濟忠義今朝廷播越宗廟殘毀觀諸
州郡雖外託義兵內實相圖未有憂存社稷卹人之意且今州
城粗定兵強士附西迎大駕即宮鄴都挾天子而令諸侯稽士
馬以討不庭誰能禦之紹將從其計潁川郭圖淳于瓊曰漢室
陵遲爲日久矣今欲興之不亦難乎且英雄並起各據州郡連

徒聚衆動有萬計所謂秦失其鹿先得者王今迎天子動輒表聞從之則權輕違之則拒命非計之善者也授曰今迎朝廷於義爲得於時爲宜若不早定必有先之者焉夫權不失機功不厭速願其圖之帝立既非紹意竟不能從建安元年曹操迎天子都許乃下詔書於紹責以地廣兵多而專自樹黨不聞勤王之師而但擅用討伐紹上書陳懇於是以紹爲太尉封鄴侯時曹操自爲大將軍紹恥爲之下僞表辭不受操大懼乃讓位於紹二年使將作大匠孔融持節拜紹大將軍錫弓矢節鉞虎賁百人兼督冀青幽并四州然後受之四年春擊公孫瓚遂定幽士紹既并四州之地衆數十萬而驕心轉盛簡精兵十萬騎萬匹欲出攻許以審配逢紀統軍事田豐荀諝及南陽許攸爲謀主顏良文醜爲將帥沮授數諫不聽五年左將軍劉備殺許州

刺史車胄據沛以背曹操操懼乃自將征備田豐說紹曰與公爭天下者曹操也操今東擊劉備兵連未可卒解今舉軍而襲其後可一往而定兵以幾動斯其時也紹辭以子疾未得行曹操畏紹過河乃急擊備遂破之備奔紹紹於是進軍攻許田豐檄數操罪乃先遣顏良攻曹操別將劉延於白馬紹自引兵至黎陽曹操遂救劉延擊顏良斬之紹乃度河壁延津南紹使劉備文醜挑戰曹操又擊破之斬文醜再戰而擒二將紹軍中大震操還屯官度紹進保陽武紹連營稍前漸逼官度遂合戰操軍不利復還堅壁操自將步騎五千人夜往攻破淳于瓊等悉斬之初紹聞操擊瓊謂長子譚曰就操破瓊吾拔其營彼固無所歸矣乃使高覽張郃等攻操營不下二將聞瓊等敗遂奔操於是紹軍驚擾大潰紹與譚等幅巾乘馬與八百騎度河至黎

陽北岸入其將軍蔣義渠營自軍敗後發病七年夏薨

節後漢書本傳

李巡汝陽人爲中常侍時宦官縱橫巡與濟陰丁肅下邳徐衍南陽郭耽北海趙祐等五人稱爲清忠皆在里巷不爭威權巡以爲諸博士試甲乙科爭第高下更相告言至有行賂定蘭臺漆書經字以合其私文者乃白帝與諸儒共刻五經文於石於是詔蔡邕等正其文字自後五經一定爭者用息

後漢書呂強傳

宋

姚仲孫字茂宗本曹南著姓曾祖仁嗣陳州商水令因家焉父曄舉進士第一官至著作佐郎仲孫早孤事母孝擢進士第補許州司理參軍民婦馬氏夫被殺指里胥嘗有求而其夫不應以爲里胥殺之官捕繫辭服仲孫疑其枉知州王嗣宗怒曰若敢以身任之耶仲孫曰幸母遽決冀得徐辦後兩月果得殺人者

商水縣志

卷十七

人物志

十一

調邢州推官徙資州轉運使檄仲孫詣富順監按疑獄全活數十人資州更二守皆愒老事多決於仲孫改大理寺丞知建昌縣初建昌運茶抵南康或露積於道間爲霖潦所敗主吏至破產不能償仲孫爲券吏民輸山木即高阜爲倉邑人利之徙通判彭州嘗以天下久無事不可以弛兵備因上前世禦戎料敵之策名防邊龜鑑通判睦州徙滁州歲旱饑有詔發官粟以振民而主吏不時給仲孫既至州立劾主吏夜索丁籍盡給之累遷尚書屯田員外郎王巖守益州辟判州事召爲右司諫入內都知閻文應求爲都知仲孫數其罪白上曰方帝齋宿太廟而文應叱醫官聲聞行在郭皇后暴薨中外莫不疑文應置毒者出文應爲泰州兵馬鈐轄又稱疾留復論奏乃亟去以起居舍人知諫院管勾國子監以尚書戶部員外郎兼侍御史知雜事

時諫議大夫十二員仲孫曰諫議大夫蓋朝廷之選不宜以歲月序進今諸寺卿至前行郎中三十五員貼近職者猶不在數若以年勞授則數年之外諫議大夫員益多請艱其選以處材望之臣餘悉次補卿監乃詔當選者奏聽旨先是諸路復提點刑獄還朝多擢爲省府官仲孫請第其課爲三等升黜之即詔仲孫司考課之法歷三司戶部度支塩鐵副使進天章閣待制河北都轉運使大修城壘兵備仁宗賜詔褒之繼知澶州河壞明公埽絕浮橋仲孫親總役隄上埽一夕復完權知大名府夜領禁兵塞金隄決河是歲澶魏雖大水民不及患進禮部郎中龍圖閣學士徙陝西都轉運使未行權三司使事屬西北備邊募兵益屯及賞賜聘問之費不可勝計仲孫悉心經度雖病未嘗廢事坐小吏詐爲文符出知蔡州因母憂喪一目卒

宋史本傳

商水縣志

卷十七

人物志

十一

明

謝直方居心端正制行高潔鄉人仰之如泰山北斗洪武十九年舉賢良方正仕至福建布政司左參議

華能由貢士任真定府同知政尚寬平教民必躬修以先之棘園蛸羅而武悍已遠矣以病歸里閭巷式之若萬石君焉

王溢由舉人除太常寺丞尋陞通政司左參議丰采峻整言詞嫺雅上甚眷顧將不次擢用以病卒於官天順七年遣禮部侍郎李紹賜祭

王榮溢之子由景泰庚午舉人任山東海豐知縣政治寬平不事操切關心民瘼有不便者更而張之好惡允協輿情有古循良之風焉

王相榮之子由進士除博士尋擢御史時年方二十有奇幼登巍

科任顯秩務單厥心知無不言一時有鐵面之譽卒爲當道所忌謫縣丞轉府同後陞浙江按察司僉事所至稱仁明焉民懷其德鄉高其行迄今不忘云

清

李振奇字平子拔貢順治壬辰任如皋知縣鄭成功餘孽擾境振奇禦之衣不解帶者兩月卒保乂安臬俗有異棍成黨火債烹民一月利倍子母負者田房婦女任意攘奪稍爲駁辯毆辱隨之善良受害莫敢誰何歷任屢經查辦該黨賄踞如故振奇廉得其情適遇異棍郝大白晝強姦黃氏毒毆義僕陳新傷重之案即稟上憲拘獲治罪奉旨嚴禁放債烹民民賴以安臬地素瘠苦振奇泣任歲薦饑餓殍遍野捐廉釀金設粥廠二十餘處饑民三十餘萬口人日給粥三碗自春初自麥秋方止迭蒙上

商水縣志

卷十七

人物志

十二

憲嘉獎臬瀕江海鹽竈伏莽動圍臬城適賊鯨又至振奇登陴堅守卒保無虞時有豐利場叛竈桑鳳所爲首投船作應領受僞旗及劄糾集亡命數千欲破臬先是狼鎮移文於縣會剿振奇恐鞭長莫及密遣練官協同鄉勇出賊不意直搗巢穴斬賊首桑鳳所擒其子桑瑞生僞軍師方國珍等並搜獲僞總鎮劄龍旗盔甲等件海賊知機洩星散具報續蒙題奏奉旨嚴審叛真情確正法又蘆課沙田江南各屬俱有如臬尤多坍荒水旱不赦甚或一田兩徵民間拖欠累至八千餘兩振奇洞悉民困到任二年代墊數百陳欠不忍比追疏請免蒙蘆政公孫批據詳具見該縣軫恤民瘼之意但大工需用孔亟歲額勢難遽蠲仰該縣多方勸徵寓撫字於催科之中可耳復詳府道按院蒙批轉詳施行又臬邑積鏹成風民多罹害振奇屢行禁緝法

愈嚴術愈工有李廣生叢公甫等籍在如皋虎踞揚州通同惡蠹擇殷而食捉風捕影頂名代鏹或和或問遂愆乃止分頭佈鏹拖累不休振奇據闔學公呈指申正法良民以安又皋民素受假兵之害皋東二十里東陳小集有土棍沈玉華冒狼營撥兵王茂名爲患鄉里居民莫敢誰何振奇因公過東陳王茂自稱保正誤公杖二十旬日病死該營指詐不肯葬振奇據貢生冒超處等呈轉詳觸該營怒船過如皋縱兵擾亂陵辱官紳振奇詳請查辦又皋邑差馬十八匹明末被賊搶去里下催馬按日支差每年約費二千餘金差官到縣任意勒索稍不飽欲陵辱鞭笞里民受害十年於茲振奇捐借購馬二十餘匹自養代民支差又恐上差依舊肆索遍申上臺以求禁絕民害永除皋地率皆斥鹵不毛厯朝定賦獨輕闔邑民竈額田共三萬餘頃

每年派銀二萬有奇明末加增練餉三千兩適奉旨新增練餉每畝一分畫一徵解突加三萬餘兩視每年條鞭反過倍半比明季增至十倍未及三限死逃接踵振奇查志書載有折地法計折皋地二千八百餘畝練餉應派二千八百兩零三申上臺蒙鳳撫具題下部核議具奏尋以病乞休迭蒙慰留力請乃准振奇於順治十六年帶病赴皋數月即求去不得請帶疴視事三載除逐火債賑饑荒免籽粒蠲陳欠緝鏹黨爭假兵賠差馬減練餉外其他捐夫價免供應懲惡奴賑貧士鋤強伸冤善政不能枚舉簿書之暇又時與二三學予談經論道培養人材故士賴玉成亦多去之日老幼男女攀轅涕泣遮留士紳歌頌德政累牘成帙歸途資絀減膳歿後皋人請建名宦祠現有皋治政畧皋治德政編藏於家子敏康熙壬子拔貢侯選州同敦廩

監生山西永寧州州判放增監生候選縣丞徹增生孫聯登增
生聯科庠生曾孫慎先乾隆庚子解元愉先歲貢生玄孫盤舉

人珍增生任嘉善縣主簿

據李氏家藏舉
治政畧增補

楊思震舉人天性孝友五世同居生平濟貧周急畧無難色與胞
弟庠生思遇於鄧城西施義地八畝餘以葬流亡任息縣教諭
二十餘年教士嚴而有法以卓異陞四川墊江縣知縣愛民如
子兩袖清風惜歷任未久遽以疾卒於官不得盡展所學云據

鄧城西義地
碑增補

高猶字允猷號毅齋性孝友品行端方強學力行得鷺湖鹿洞薪
燈領康熙辛酉鄉薦秉鐸宛南下車即整飭學宮勸諭士子務
使學行兼修又立考課法嚴去取賞罰必明士子鼓勵文風大
振邑自國初以來垂五十年無登賢書者迨甲午鄉榜獲售者

商水縣志

卷十七

人物志

十五

二人嗣是登第者蟬聯不絕方伯李高其學行欲以卓異舉於
朝猶固辭是年湖廣鄉試分校闕員聘爲同考所取七人皆名
下士云

李楫字宇岸幼聰敏篤志好學嘗臨食看書誤以墨汁爲蒜汁其
專精如此學問淵博康熙丙午鄉薦第二任光州學正天性仁
愛諸事認真爲士林欽仰從遊者衆昕夕啟迪諄諄不倦一時
承其訓者多知名士頌聲遠播上憲亦嘉美之適遇州篆開缺
委攝州事月餘興利除弊尤能遺愛在人

喬履信字實夫號敦峯幼聰穎善讀書恪承庭訓未弱冠補博士
弟子員年二十一領雍正己酉鄉薦明年成進士雖少登第而
謙謹自持粥粥若無能者居平溫厚和易臨事則明敏決斷與
人交開誠布公然諾不欺奉旨發陝西學習到省即委署郿縣

篆下車興利除害政聲卓卓未幾調富平富俗故多澆漓履信以醇樸化之尤以培養人材爲己任捐俸建南湖書院置田百餘畝俾士子肄業其中暇則爲講學論文一時文風翕然丕變又詳豁孫姜里衝決田懸額革大里長承辦科歛金邑民戴之以能聲遷咸寧令咸寧出借向皆舖戶領納里民貼賠自履信辦理後奸弊一清尋以薦候考御史會丁內艱服闋補禮部主事候補御史一時都下想望丰采並以覘其才猷丙寅春卒年三十八朝士多爲扼腕所著有鄉甲條約一冊陝西通志三卷富平志八卷寧遠堂詩草一卷

據河南通志增補

郭天錫字簡侯副榜姿性岐嶷好讀書無寒暑孜孜不釋手嘗就學外家外家故宦族積書極多天錫肆志搜覽經書子史靡不博洽弱冠補博士弟子員無何流寇至圍城甚急天錫度不保

商水縣志

卷十七

人物志

十六

因與父母夜縋城去路遇賊傷父天錫號哭求以身代賊感動棄去天錫與母扶父歸已而父卒天錫號泣幾絕葬後奉母避他處時闖賊來去無常不得耕又大旱蝗人食樹皮草子顛沛流離殆無虛日清朝定鼎始得旋里舌耕以奉母中順治戊子科副車會知縣高奉檄纂邑乘聘天錫主筆與劉恂傅雅言郭爾封雷鳴魯共編輯書成授平陽府理刑未之任缺尋裁改授順天文安縣知縣莅任以興利除害爲己責勸農課桑歷九載以卓異遷內府中書科中書舍人奉旨諭祭南岳復命後遂以病致仕優游林下幾二十年卒年七十五

以上舊志

額贊之

馮堯極任江南儀真縣稅稞局大使民有積年逋欠堯極皆代爲

設法完納民甚德之

上二人錄舊志選舉志注

趙澗字懷源號穎南曾祖之魁祖榮桂俱庠生父廷球廩膳生均好善多厚德澗性魯而好學少承庭訓乾隆戊午舉於鄉戊辰成進士任澗縣知縣政留遺愛晚年致仕家居教授鄉里多所成就子承歡臨觀皆廩生

趙錦章字襄雲貢生祖起祥知錦章有幹濟才爲捐知縣嘉慶癸亥選授福建將樂縣在職五年政績卓著引病回省病痊加捐知府庚辰選授山東東昌府莅任二載有政聲道光壬午丁外艱服闋仍補原任錦章勤政愛民所至士民戴之有趙青天之頌弟龍章有傳

趙龍章字石泉儀表魁梧有膽略嘉慶庚申科武舉選授四川順慶營遊擊在任拏獲南充縣匪犯李允把等並搜獲天幾匪員

商水縣志

卷十七

人物志

十七

逆書蒙四川督部堂常保奏陞兩廣督標後營參將奉委前往德慶封川羅定東安西甯一帶捉獲盜犯並鄰境著名匪首葉啞七等共二百餘名蒙兩廣總督部堂蔣於預保副參案內保列一等參將引見後又着以副將升用交軍機處記名旋署羅定營副將前後協獲鄰境盜犯梁金彈子蘇繼明等嗣任福建福州城守副將歷署漳州建甯汀州各鎮總兵迭獲洋盜鹽梟及平頭會匪多名升臺彎提督道光九年卒於官

李軒字朗臣父繼祖以恩貢選鄭州訓導嘉惠士林兄輔進士軒少聰穎喜讀書與兄肄業陳州絃歌書院時年未十齡知府瞿一見推爲國器後以優貢中順天鄉榜考取臚錄授鄆陵縣教諭遊其門者成全甚衆旋致仕家居周口沙河下游聶隄等處每河水暴發幾患衝決軒集衆增高培厚得保無虞里人德之

以姪應棠爲嗣

李恒仁字聖基監生生而穎異父淇奇之冀其克紹祖德故命名恒仁甫受讀即以修己治人爲心數試未售慨然曰丈夫欲濟人利物將囿於制藝老於場屋乎遂棄舉子業援例入成均捐知縣尋補授直隸宛平下車即問民疾苦查胥吏積弊有大族爭產牽及家務經數任不能判恒仁招至諭以倫常大義有感激泣下者願罷訟儉於自奉一切陋規悉豁免其應用諸物及供給上官者照市價發給舉辦諸善政廉俸不副取給於家因此賠累去之日民爭攀轅挽留

李輔字文臣道光甲辰進士授知縣分發江西以母老告近改安徽署青陽尋補潛山實心愛民循聲卓著丁內艱服闋例歸原省補用咸豐元年委署德化時粵匪竄擾湖南德化地處衝途

商水縣志

卷十七

人物志

十八

兵差絡繹是年冬武昌失守江南震動巡撫張公督師駐紮九江防堵供億浩繁三年正月粵匪自湖北順流而下水陸並至勢燄洶駭九江防堵全師驚潰輔誓與城存亡賊至憤激投水被丁勇拯救逾時始甦五月粵匪自金陵回竄江西圍省城九十餘日輔幫同守城兼辦支應局解圍後蒙憲奏免餘罪五年浙江甯紹台道羅自湖北救援江右奉委入營投效隨營千里克復義甯後蒙羅稟請湖北巡撫胡公奏准開復七年五月委署鄱陽該縣密邇皖疆連壤半屬賊壘烽火相望刁斗時聞輔同饒州府倡辦團練籌兵籌餉心力俱瘁越年交卸十年七月代理新淦次年二月不意粵匪由撫郡竄縣境輔倉猝率勇出城堵禦賊已由間道入城雖旋即率勇克復而彈章已挂矣既卸事泊舟河干不料賊由水路突至搶掠一空徒步抵省憂勞

成疾卒於省寓子應署應秩應畹監生字蘭九績學未售同治初項城袁文誠公保恒督辦西征糧臺邀應畹隨營差遣因保縣丞留陝山補用光緒間前直隸總督袁以欽差駐高麗委應畹辦理釜山交涉事宜甚資得力以功保直隸州知州尋保道員子蔚初山東候補知縣宣統間署理新城縣事

李愨公字梓亭廩生捐知縣賦性磊落倜儻不羣讀書有大志以濟人利物爲己任嘗助其父維賀辦賑濟修河渠諸事旋援例登直隸仕版歷署贊皇博野晉州多政績有勾奸謀殺命案歷任不能決愨公至立判人服其明卒於官宦囊蕭然無力返櫬同寅某素重其行捐貲親送其家

王祥五字瑞林家素封少年好客座上常滿遂致中落性直爽喜任事咸豐八年捻匪擾縣境祥五與邑紳傅成五等協力守禦

商水縣志

卷十七

人物志

十九

城賴保全以功獎五品銜聖廟頽廢請於縣主修葺之并改建奎閣祥五親自督工始終不懈同事者有庠生周南錢世寶等二載始竣同治乙丑援例捐巡檢分發湖北旋補黃梅縣停前驛巡檢保升縣丞代理黃梅縣事尋以年老積勞卒於官

李毓英字俊卿父天章輕財尚義家中落遊舞陽卒於旅寓時毓英年未成童聞訃偕弟擢英匍匐奔喪扶櫬歸哀毀如成人竭力營葬家益窘母雷氏攜諸孤往依外祖雷兼山郟城任所教之甚嚴毓英昆仲各知奮勉越三載與弟擢英同遊泮水旋食餼同治甲子領鄉薦家居教授成全甚衆歷主鎮平西平杞縣光州各處講席學品爲士林欽仰毓英性孝友館西平時聞母凶耗號痛欲絕不食者累日待二弟怡怡無間言光緒庚辰大挑知縣分發江蘇適鹿邑徐制軍廣縉僑寓吳門素所器重俾

子弟從學焉毓英雖需次旅寓潛心吏治公餘之暇猶致力於經史務爲實學以求精進嗣充海運委員途次積勞成疾卒於寓所年四十有二事業未就賈志以歿惜哉子國璋附貢同知銜直隸候補通判

周於德字明甫號蓮塘拔貢生歷署林縣封邱教諭天性孝友篤信好學家貧授徒誘掖多方光緒十三年河決鄭州周鎮被災於德助委員經營防禦設粥賑濟攝封邱學篆蠲免陋規與諸生研經論文始終不倦時同寅訓導劉卒於官貧無以歸於德多方勸募送劉櫬旋里尋委署唐縣學以年高固辭老尤嗜書歿前一日猶持周易展玩不置子慶祉壬寅癸卯并科舉人李擢英字子襄生而穎異孝友性成六歲失怙哀毀逾成人時父遊學舞陽聞訃從兄毓英匍匐往奉櫬歸葬家貧母雷氏攜子

女依外祖雷兼山於鄆城學署學日進與兄毓英同入邑庠旋食餼同治癸酉入拔萃科並登賢書旋丁內艱光緒丁丑成進士以主事用分刑部直隸司行走大司寇潘公器重之庚寅補直隸司主事壬辰提員外旋補直隸司郎中在部十六年承審案件片言立斷疑難大獄多賴昭雪其尤著者如戊子京師北沿溝姦婦謀害本夫一案擢英閱案至此曰是有疑竇再三力爭開棺檢驗卒爲死者伸冤又承修城工天德木廠毆斃工人一案當道者一意回護始以威挾繼以利誘擢英屹然不爲動卒成信讞一時京城有李青天包孝肅之稱庚寅蒙欽差大臣貴沈等奏請隨往福建查辦事件甲午蒙欽差大臣裕慶奏請隨往四川查辦事件先後所至凡累年要案皆爲平反乙未考取御史記名丙申除江南道監察御史首以河南全省賦稅過

重請旨明予限制剔除中飽洋洋數千言疏入允行是年回匪
侵擾陝山勢甚猖獗上方倚重該省巡撫魏光燾授以勦撫機
宜該撫老師糜餉無敢言者擢英劾以疆臣擁兵欺飾難期振
作請旨申斥已往策勵將來疏入允行未幾西陲肅清又劾河
北鎮崔廷桂與子道員鴻鼎父子同省枉利營私誣良爲盜並
盜賣武備庫鉛條鉛彈等情上命河南巡撫劉查辦按實褫職
其他財政水利學校礦務等有關國計民生者無不剴切詳陳
多蒙採擇見諸施行丁酉轉貴州道監察御史又命巡視北城
事務北城地當衝要詞訟日數十案隨批隨斷毫無留滯常曰
吾儕聽斷少事一刻流連卽爲小民多留一刻幸福識者以爲
仁人之言庚子春升刑科給事中又命巡視西城事務時拳匪
恣肆蔓延數省舉朝多被煽惑擢英獨疏以邪術不足恃外夷

不可欺乘此各國求和宜許之以收美滿效果上不能用至八
月兩宮西巡擢英留守西城與紳董惲毓鼎憑恕等爲守御計
後各國聯軍到京擢英與美國統帶官戴麗生訂地方自治章
程凡事據理直爭其將佐時以槍械相嚇不少退縮卒如所議
民心始定該紳董以保全數十萬生靈財產擬立生祠以報德
力卻曰天子蒙塵孤城被陷徒以一息尚存爲民請命此守土
者分內事若等祠我非榮我實辱我也事乃寢辛丑春以功擢
內閣侍讀學士壬寅特賞二品銜尋遷太常寺少卿甲辰晉大
理寺少卿奉命稽查右翼宗學乙巳上方銳意圖新聘日本刑
名家改訂法律侍郎沈某董其事擢英辨難甚力召對時直斥
其非致以阻撓新政忤上意丙午秋命開缺另候簡用丁未春
疏請修墓期滿回京凡新政之蠹國害民者仍隨時奏陳利害

冀動上聽戊申冬慈禧太后暨景皇帝賓天擢英悲戚逾常致
患目疾宣統紀元授禮部參議嗣以景皇帝梓宮大行欽派西
陵奉安大臣庚戌欽命甘肅新疆考試法官正考官所取皆學
術純正士不僅以新學見長辛亥遷典禮院直學士兼禮學館
提調討論禮制務期精當因是心力俱瘁是年七月以衰老乞
休解組歸來與太康王新楨項城楊凌閣淮陽周景濂于雲樓
西華凌甲烺約爲宛邱耆英社講求實學暇則飲酒賦詩以娛
晚年擢英平生受外祖教養之德嘗設位中堂終身奉祀爲請
四品封典處兄弟忍讓無爭服官四十年服御一如寒素遇戚
友以急告者無弗應雖退居林泉心在君國迨北闕揖讓流涕
竟日卒以憂國致疾不克復起疾革時口喃喃猶念切觚稜也
卒年七十著有文集暨駢體文若干卷退思齋詩草四卷庚子
國瑜候選州判次國璜四品廕生

傅振德字惠民東河巡檢智謀義斷邑令曹公器重之修試院及
城池皆委任焉振德矢公矢慎不憚勞瘁工竣曹公推振德爲
首功詳呈上憲調省差委旋委南汝光許諸路查辦錢色繼委
彰衛懷諸路查辦溝渠振德肆應咸宜聲名藉藉河道調委河
工稽察振德勤慎詳審稽弊查奸罔有疎虞光緒十三年告假
回里未及一月鄭工決口聞變星夜奔馳破浪前往不惜性命
河督嘉其忠誠派監督土工至十四年五月龍子場失慎火猛
風烈衆驚惶失措振德神色不變率衆運土撲壓立滅河督聞

之記大功一次合龍後保加五品銜二子長啟瑞州同次啟鈞
廩生乙酉科考取一等以巡檢用

以上採
訪稿

